

WESTERN

Bosnian Islamic Cultural Center Chicago
7022 N Western Ave, Chicago IL 60645

Newsletter

Bošnjaci Čikaga na ime izgradnje Islamskog Centra Ćamil ef. Avdić

UVAKUFILI

\$1,140,000.00

1. JULI 2016. - početak akcije

RAMAZAN 2017. - prikupljeno \$480,000.00

JANUAR 2018. - Formirano Savjetodavno
vijeće za izgradnju novog centra

RAMAZAN 2018. - prikupljeno \$1,140,000.00



WESTERN

Bosnian Islamic Cultural Center Chicago
7022 N Western Ave, Chicago IL 60645

Newsletter

UVODNA RIJEČ

Cijenjeni Bošnjaci, es-salamu alejkum. Pred Vama je sedmo izdanje časopisa "Western Newsletter" koji izlazi jednom godišnje i čiji je cilj da zabilježi najznačajnije događaje u našoj zajednici i najvećem bošnjačkom džematu u Čikagu – Bosnian Islamic Cultural Center.

Mnogobrojni događaji koje vidite rezultat su našeg zajedničkog napornog rada. Različite vjerske, edukativne i kulturne aktivnosti pokazuju našu svestranost i želju da u svim sektorima doprinesemo razvoju naše zajednice. Smatramo da jedan događaj, ukoliko se o njemu ne načini zapis, poslije određenog vremena kao da se nije ni desio. Ovako, oni ostaju trajni pečat o nama i našim aktivnostima. Sve navedene akcije i aktivnosti oblikovale su nas same i našu zajednicu, uticale su na naša kretanja, kako na individualnom tako i na kolektivnom nivou. Slike možda ne pokazuju sve aktiviste, možda su neki od Vas više zastupljeni, a neki manje – no poenta je da pokažemo zajednički trud i djelovanje. Napredak koji je ostvario džemat BICC u proteklih šest godina je zaista veliki i šteta bi bilo da ne sačuvamo trag o našem kretanju.

Danas, kada mediji oblikuju sliku o muslimanima onakvu kakvu oni žele, mi se borimo da na lokalnom nivou pokažemo jednu kvalitetno integrisanu zajednicu u američko društvo koja i pored toga nije izdala svoje tradicionalne, vjerske, kulturne i nacionalne vrijednosti. Taj kontinuitet očuvanja našeg identiteta pomogao nam je da shvatimo da samo sa kvalitetnim sadržajima i osiguranjem adekvatnijih uslova za njihovo realizovanje jedna zajednica može opstati.

Bošnjaci Čikaga su se trgnuli iz sna i da kažem drznuli da rade na generacijskom projektu – izgradnji Islamskog centra "Ćamil ef. Avdić". Oni su postali svjesni značaja čuvanja svojih korjena, shvatili su da moraju čuvati sjećanje na svoje vjerske i nacionalne lidere, jer je to način očuvanja njihovog bića. Narod čiji su lideri ubijani, kojemu je nacionalni identitet zamjenjivan vjerskim i na taj način bivao definisan kao vjerska skupina; narod koji je zbog svoje vjerske i nacionalne pripadnosti protjerivan i nad kojim je počinjen genocid ne smije dozvoliti da se asimilira i nestane. Zaborav nije naše pravo, a asimilacija nije naš izbor. Mi želimo sebi dokazati da bosanski šehidi nisu uzalud založili svoje živote. Zato i jesmo ustali svi zajedno i zato smo se okupili s ciljem da našoj djeci osiguramo bolju budućnost, a njih obavezujemo da taj emanet čuvaju i da tu baktlu šehadeta i nacionalnog emaneta uruče sljedećim generacijama. Zato čestitam svima Vama koji ste uzeli učešća u akciji izgradnje novog centra u Čikagu i pozivam Vas da u tome ustrajemo. A Allah je sa strpljivima i čestitima!

Neka Vas Allah poživi u dobru!

Uredništvo časopisa "Western Newsletter"

Urednik: **Muriz Mešić**

Savjetnici: **Amir Ovčina, Semir Delić, Edis Bečić, Elmedin Halilić, Nedžad Kopic, Nermin Krličević i Dževad Šorlija**

Lektor: **Amina Sendić-Mešić**

Fotograf: **Ibrahim Hadžić**

Dizajner: **Osman Erdić**

Izdavač: **BICC Chicago**

Tiraž: 600

SADRŽAJ

Prvi sastanak Savjetodavnog vijeća	3
Vrijedna ekipa džematskog Odbora	4
Skupština medžlisa: Naši delegati boravili u Minneapolisu	5
Sabor 2018	6
Formirano VIJEĆE RODITELJA	7
Počela nova školska godina u Bosanskoj školi	8
Izlet na Jonamac Orchard Farm	10
Predstavnici MCC Academy u Mektebu	11
Konzulat ugostio predstavnike Bosanske škole	12
Senad Hadžifejzović pohodio Bosansku školu	13
Bosanska škola u Čikagu obilježila Dan nezavisnosti BiH	14
Svečanost u Mektebu: Hatme 2018	16
Svečana dodjela diploma u Bosanskoj školi	18
Škola Kur'ana iznjedrila nove učeće Kur'ana	20
Velike pobjede našeg Mekteba	21
Mevlud	22
Omladina na skijanju	24
Druženje sa omladinom iz BYC	25
BYC u akciji	26
Posjeta Hazimu Hadžaliću	27
Liječenje našeg učenika iz Mekteba	28
Posjeta školi	28
RAZGLEDNICA IZ ČIKAGA	29
Druženje sa našim doktoricama	32
Iftar Youth	34
Iftar kod Mayora	34
Naš ramazanski gost, hfz. Davud Efendić	35
RAMAZAN U ČIKAGU	36
Hafiska mukabela u Čikagu	39
Mr. Sead ef. Brahorović u BICC-u	39
Veličanstvena noć Kadr u Čikagu	40
Ramazanaski BAJRAM 2018	42
Svečano otvaranje džamije u Hamiltonu (Canada)	44
Večer vakifa 2018	45



Prvi sastanak

Savjetodavnog vijeća

U nedjelju, 18-og februara 2018.godine, održan je prvi sastanak Savjetodavnog vijeća za izgradnju novog Islamskog centra "Čamil ef. Avdić" u Chicagu.

Na sastanku su izabrani predsjednik i koordinatori koji će prije svega u javnosti predstavljati ovo vijeće i projekat na kojemu radimo. Tako za novog predsjednika jednoglasno je izabran advokat Amir Ovčina, dok su za koordinate izabrani Semir Delić i Edis Bečić.

Sastanci se održavaju na sedmičnom nivou, u cilju da se realizacija projekta ubrza i da se intenzivnije radi na predstavljanju ovog projekta čikaškoj zajednici kao i na prikupljanju donacija.

Savjetodavno vijeće čine: Amir Ovčina, Semir Delić, Edis Bečić, dr Mensur Šunje, Ifeta Redžović, Nihad Latić, Senad Mujkić, Salko Dračić, Smajil Selimagić, Muhamed Hujdur, Adis Alić, Amir Ahmetović, Almir Šehović i hafiz Muriz Mešić.

Molimo Allaha da nam podari uspjeh na oba svijeta!



Vrijedna ekipa DŽEMATSKOG ODBORA

Džematski Odbor u proteklih 12 mjeseci održao je ukupno 16. **redovnih mjesečnih sastanaka** na kojemu su razmatrane sve džematske aktivnosti. Možemo zaključiti da su džemat BICC odlično funkcionirao i da iz godine u godinu rastemo i napredujemo, hvala Allahu.

Članove Odbora u ovom mandatu sačinjavaju: **Elmedin Halilić** – predsjednik, **Nedžad Kopic** – sekretar, **Dževad Šorlija**, **Nermin Kričević** i imam, dok su za finansijske poslove zaduženi džematski računovođa **Jasmin Zorlak** i blagajnica **Vasvija Čolpa**.

Uoči ramazana predsjednik džematskog Odbora uručio je zahvalnicu našem računovođi **Jasminu Zorlaku** na ime dugogodišnjeg vođenja džematskih računa i sa njim dogovorio nastavak poslovne profesionalne saradnje za još jedan kvartalni period. Obzirom da ovaj džematski Odbor, kao nijedan ranije, ima poseban teret da se brine o finansijskom aspektu izgradnje novog islamskog centra naglašeno je da to mora da bude na vrhunskom nivou profesionalizma te da se vodi briga i o najmanjim detaljima. Sa novom blagajnicom Vasvijom Čolpom i novim profesionalnim angažmanom našeg Zorlaka vjerujemo da će to u narednom periodu tako i biti.



Naši delegati boravili u MINNEAPOLISU

Početak 2018. godine u džematu ICBMN u Mineapolisu održana je centralna godišnja svečanost medžlisa Midwest. Svečanosti je prethodila uspješno organizovana peta redovna Skupština medžlisa Midwest koja se ovog puta održala u Mineapolisu, a kojoj su prisustvovali i delegati džemata BICC: Nedžad Kapić – sekretar džemata, Dževad Šorlija – član džematskog Odbora, i naš imam, hafiz Muriz Mešić.

Džemat BICC u sastavu je Islamske zajednice Bošnjaka Sjeverne Amerike (ICNAB-a) još od svog osnivanja, tako da redovno delegati našeg džemata učestvuju u svim aktivnostima medžlisa Midwest, odnosno ICNAB-a. Naredna aktivnost je Sabor ICNAB-a koji je ove godine zakazan u Denveru krajem mjeseca marta.



Sabor 2018

Delegacija našeg džemata boravila je krajem marta mjeseca u Denveru, Colorado, gdje su prisustvovali Saboru Islamske zajednice Bošnjaka Sjeverne Amerike i svečanom otvaranju novoizgrađene džamije.

Džemat BICC predstavljali su Elmedin Halilić - predsjednik, i naši stalni delegati Semir Delić, Edis Bečić i naš imam, hfz. Muriz ef. Mešić.

Predstavnici našeg džemata iskoristili su ove svečanosti da predstave projekat izgradnje Islamskog centra "Ćamil ef. Avdić" i aktivnosti našeg džemata.



Formirano

VIJEĆE RODITELJA

Početkom mektske 2017/18. godine na inicijativu hafiza Muriza ef. Mešića formirano je Vijeće roditelja i održan je prvi sastanak s ciljem poboljšanja uslova za realizaciju nastave u Mektebu i Bosanskoj školi.

Vijeće roditelja ima ulogu da pomogne vjeroučiteljima u realizaciji nastavnog programa i da doprinese organizaciji značajnijih događaja za našu djecu.

Iako je tek formirano, Vijeće roditelja je pokazalo veliku želju i znanje da unaprijedi funkcionisanje onih aspekata mektske nastave koji pripadaju roditeljima; poput organizacije izleta, poboljšanja saobraćajne kulture, organizacije zabava za djecu i sl.





Počela nova školska godina u BOSANSKOJ ŠKOLI

Povodom početka nove 2017/18. školske godine Bosansku školu su posjetili generalni konzul gosp. Berislav Vujeva, konzul gđa Darija Bugarin, i konzularni radnik gosp. Vaso Marinković. Odmah na početku je gosp. Vujeva našoj djeci poželio uspješnu školsku godinu i obećao nastavak konzularne podrške Bosanskoj školi što znači da će i ove godine naša djeca dobijati diplome ovjerene od strane Ministarstva civilnih poslova BiH.

Nakon svečanog otvaranja nove školske godine, konzularno osoblje upriličilo je sastanak sa roditeljima i ponudilo im svoju podršku u cilju rješavanja svih konzularnih usluga sa posebnim naglaskom na dobijanje državljanstava za našu djecu.

Profesorice u Bosanskoj školi, Amina Sendić-Mešić i Enisa Omerović, zahvalile su Generalnom konzulatu BiH u Chicagu na podršci koju im daje, a imam hfz. Muriz Mešić najavio je nastavak dobre sarad-





nje BICC-a sa Konzulatom i pozvao roditelje da budu uporni u rješavanju neophodne papirologije u cilju registracije njihove djece.

Ovo je šesta godina od kako Bosanska škola djeluje u BICC-u, a ove godine pohađa je rekordan broj učenika, njih 110, koji su raspoređeni prema razredima od prvog do četvrtog.



Izlet na Jonamac Orchard Farm

Na početku mektske 2017/18. godine Vijeće roditelja organizovalo je prelijep izlet na Jonamac Orchard Farm gdje su se djeca i roditelji odlično zabavljali.




Predstavnicí MCC Academy u Mektebu

Sredinom marta mjeseca delegacija islamske osnovne škole MCC Academy, koju je predvodio direktor Mr. Habeeb Quadri zajedno sa još tri učiteljice Mrs. Emina Kurtović, Mrs. Edisa Metović i Mrs. Sanela Omerbegović, posjetila je naš centar.

Oni su prisustvovali roditeljskom sastanku kojeg su vodili hfz. Muriz Mešić i prof. Enisa Omerović, koji su ih upoznali sa radom u Mektebu i u Bosanskoj školi, te

aktivnostima u našem centru. Tom prilikom gosti su se obratili roditeljima i upoznali sa aktivnostima školske ustanove iz koje dolaze i predstavili svoje projekte.

Nakon obraćanja roditeljima, na poziv vjeroučiteljice Enese Mehmedović, direktor Mr. Quadri održao je čas islamske vjeronauke našoj djeci u Mektebu. Bili su to nezaboravni trenuci za svu našu djecu. Sve pohvale Vijeću roditelja na uspješnoj organizaciji ovog događaja.



Vrijedne vjeroučiteljice, Enesa mehmedović i Jasmina Ejupović, uveliko su unaprijedile rad Mekteba.



Konzulat ugostio predstavnike BOSANSKE ŠKOLE



Povodom završetka školske 2017/18. godine, Generalni konzulat BiH u Čikagu na čelu sa Generalnim konzulom gosp. **Berislavom Vujevom** i konzulom gosp. **Edinom Šehićem**, ugostio je predstavnike Bosanske škole Čikago. Sastanku su prisustvovala voditeljice ovog projekta, **prof. Amina Sendić-Mešić** i **prof. Enisa Omerović**, dok je BICC predstavljao **hfz. Muriz Mešić**.

Profesorice su predstavile događaje u Bosanskoj školi iz protekle školske godine i informisale Konzulat o aktivnostima koje se provode u cilju dodatnog unapređenja ovog projekta.

Zaključeno je da je Bosanska škola u Čikagu jedan od najuspješnijih projekata na teritoriji Sjeverne Amerike i da ga treba unapređivati i davati mu punu podršku.

Predstavnici konzulata zahvalili su se na posjeti i potvrdili svoj dolazak u BICC na svečanu dodjelu diploma, 12-og maja ove godine.



Senad Hadžifejzović pohodio BOSANSKU ŠKOLU



Bosanska škola Čikago je nadasve jedan jako popularan i po mnogočemu unikatan projekat. Tome u prilog najbolje govori činjenica da je prva certificirana škola ovakve vrste na teritoriji Sjeverne Amerike od strane Ministarstva civilnih poslova BiH koja radi prema njihovom programu za dopunske škole u dijaspori. I ne samo to, ovu školu pohađa preko 100 učenika!

Čuvši za ovaj projekat, ekipa Face TV-a na čelu sa najpoznatijim bosansko-hercegovačkim novinarom, Senadom Hadžifejzovićem, posjetila je prostorije našeg centra i tom prilikom obavila intervju sa voditeljicama ovog projekta, prof. Aminom Sendić-Mešić i prof. Enisom Omerović.

Osim toga, Senad Hadžifejzović bio je jako zainteresovan projekat izgradnje novog centra u Čikagu, o čemu su ga pobliže upoznali predstavnici Savjetodavnog vijeća, Semir Delić i Edis Bečić.

O vjerskim i edukativnim aktivnostima BICC-a govorio je naš imam, hfz. Muriz ef. Mešić.

Raduje nas činjenica da je priča o izgradnji novog centra u Čikagu stigla i do glavnog grada Bosne i Hercegovine, ali nas posebno raduje činjenica da je Bosanska škola projekat koji budi veliko interesovanje ne samo nas roditelja već i bosansko-hercegovačkih medija. Nadamo se da će i država BiH prepoznati značaj ovakvih projekata i da će nas predstavnici Ministarstva civilnih poslova BiH također posjetiti.

Bravo za BICC i Bosansku školu!



Bosanska škola u Čikagu

DAN NEZAVISNOSTI



Posljednjeg vikenda u februaru u Bosanskoj školi u Čikagu na svečan način obilježen je Dan nezavisnosti Bosne i Hercegovine. Tom prilikom voditeljice ovog projekta, prof. Amina Sendić-Mešić i prof. Enisa Omerović, uz pomoć volotera iz reda Vijeća roditelja za djecu su priredile radionicu u okviru koje su se djeca takmičila u izradi bosanskih ćilima. Iako su svi naši učenici pobjednici, u okviru ove svečane radionice pobjede su odnijeli učenici prvog i drugog razreda.

Bosanska škola je jedinstven pilot projekat, prvi takve vrste, pokrenut na teritoriji Sjeverne Amerike uz podršku Generalnog konzulata BiH u Čikagu, s ciljem da se naša djeca obrazuju na maternjem bosanskom jeziku i da uče o historiji i kulturi svoje zemlje. Ova škola certificovana je od strane Ministarstva civilnih poslova BiH, a radi se prema programu za učenike



gu obilježila OSTI BIH



u dijapsoni koje je uradilo pomenuto ministarstvo. Ovo je već šesta godina kako uspješno djeluje, a školu pohađa preko stotinu učenika. Ovakve aktivnosti među našom djecom doprinose jačanju ljubavi prema Bosni i Hercegovini, te izgrađuju nacionalnu i kulturnu svijest. Ovom prilikom želimo da posebno pohvalimo našu dječicu koja vrijedno rade i marljivo uče, ali svakako i voditeljice ovog projekta bez čijeg zalaganja ovo ne bi bilo moguće. Svakako da zahvalnost dugujemo i Generalnom konzulatu BiH u Čikagu, Odboru našeg centra, Vijeću roditelja, ženskoj grupi "Bošnjakinja" i svima koji su doprinijeli da ovaj projekat traje. Ovogodišnji medijski pokrovitelj obilježavanja Dana nezavisnosti BiH je BATV iz Njujorka, koja je ovom prilikom sačinila i reportažu o Bosanskoj školi na čemu im se iskreno zahvaljujemo.

Svečanost u Mektebu

HATME 2018



Povodom završetka mektske 2017/18. godine u subotu, 12-og maja, upriličena je svečanost dodjele diploma za sve učenika koji su pohađali Mekteb u našem džematu.

Ovu svečanost je organizovalo Vijeće roditelja uz podršku džematskog Odbora i tom prilikom djeci su uručili vrijedne nagrade. Kao što vidite Vijeće roditelja se potrudilo da svako dijete dobije na poklon paketić sa vrijednim sadržajima, a naše džematlije Šejla Medžiković i Senada Dračić donirale su novac za sve učeće Kur'ana, odnosno slatkiše za sve polaznike.





Posebne pohvale na kvalitetnoj mektebskoj nastavi pripadaju našim vjeročiteljima, prije svega hafizu Murizu ef. Mešiću, a zatim njegovim pomagačima: hfz. Amiru ef. Čaušu, Enesi Mehmedović i Jasmini Ejupović. Oni su vrijedno radili tokom cijele godine da bi naša djeca usvojila što više znanja i naučila lijepo islamsko ponašanje.

Mektebsku nastavu u džematu BICC u mektebskoj 2017/18.godini pohađalo je 244 učenika, od koji 28 učenika su učaci Kur'ana.



Svečana dodjela diploma



U subotu, 12-og maja 2018.godine, u prostorijama BICC-a upriličena je svečanost povodom uspješnog završetka školske 2017/18. godine u okviru koje su prisutnim učenicima uručene diplome. U ime Generalnog konzulata BiH u Čikagu, diplome je uručio naš novi Konzul, gosp. Edin Šehić, koji je u svom uvodnom obraćanju naglasio značaj ovakvih aktivnosti u bosansko-hercegovačkim centrima u dijaspori. On je naglasio da je Bosanska škola u

Čikagu uspješan primjer koji drugi trebaju slijediti. Ovaj projekat svakako ne bi se mogao realizovati bez, prije svih, profesorica bosanskog jezika i književnosti – prof. Amine Sendić-Mešić i prof. Enise Omerović, koje su svojim zalaganjem u proteklih šest godina pokazale da sve je moguće ukoliko se hoće. One su te koje su ovaj projekat učinile prepoznatljivim u cijeloj Sjevernoj Americi, a zbog njihove požrtvovanosti i zalaganja naša djeca sa



ma u Bosanskoj školi



radošću odlaze na časove Bosanske škole. Svakako, Bosanska škola duguje zahvalnost Odboru BICC-a, kao i Vijeću roditelja i ženskoj grupi "Bošnjakinja" koji pomažu rad ove škole i doprinose da se aktivnosti odvijaju bez zastoja, a pored njih zasluge svakako pripadaju i našem hafizu Murizu ef. Mešiću koji neumorno radi na svim aktivnostima u našoj čikaškoj zajednici. Bosanska škola u Čikagu je prva licencirana škola u

Sjevernoj Americi koja radi prema programu Ministarstva civilnih poslova BiH, a ove školske godine Bosansku školu je pohađalo 102 učenika, što je za svaku pohvalu.

Iskrene čestitke svim učenicima i njihovim roditeljima, profesoricama, predstavnicima Generalnog konzulata BiH u Čikagu, Odboru BICC-, Vijeću roditelja i svima onima koji su na bilo koji način doprinijeli da ova priča bude moguća.



Škola Kur'ana iznjedrila nove učache Kur'ana



U srijedu, 25-og maja 2018.godine u našem džematu upriličena je svečanost dodjele diploma ovogodišnjim polaznicima Škole Kur'ana za odrasle. Ove godine njih dvadeset redovno je pohađalo časove Škole Kur'ana, a treba kazati da je ovo šesta sezona od kako ova aktivnost djeluje u našem džematu.

Diplome na ime uspješnog učenja sure el-Kehf uručene su učacima:

1. *Fadil Delić*
2. *Šaban Delić*
3. *Fikreta Delić*
4. *Meliha Kaplanović*
5. *Fatima Mešinović*
6. *Vesna Duraković*
7. *Ismeta Šišić*
8. *Hanka Dizdarević*
9. *Sabina Husomanović*
10. *Senija Smajlović*
11. *Suada Križevac*

Diplome na ime uspješnog učenja arapskog pisma preuzeli su:

1. *Dževad Šošić*
2. *Sejad Fale*
3. *Samira Kopic*
4. *Sanela Ovnović*
5. *Šejla Medžiković*
6. *Amina Đonlagić*

Kako je napomenuo voditelj ovog programa, hfz. Muriz ef. Mešić, novi učaci Kur'ana su najljepši predramazanski poklon džematu BICC.



Velike pobjede našeg MEKTEBA

Učenici našeg Mekteba najveći su pobjednici finalnog mektebskog takmičenja u okviru V Omladinskih susreta medžlisa Midwest...

Dva prva mjesta, i jedno treće - najbolji je pokazatelj da kvalitet mektebske nastave u našem džematu na zavidnom nivou.

Pogledajte ko su naši pobjednici:

Amir Mezit - 1. mjesto

(najmlađa kategorija - ILMIHAL)

Haris Omerović - 3. mjesto

(srednja kategorija - SUFARA)

Medina Husomanović - 1. mjesto

(najstarija kategorija - KUR'AN)



Naša omladina nastupila je u sportskom dijelu susreta; dječaci su kao i proteklih godina imali dvije ekipe koje je vodio njihov trener Senad Adžamija, dok su djevojke na čelu sa Jasminom Ejupović predstavljale dvije ekipe u odbojci i osvojile su 3. mjesto.

Džematski hor NUR nastupio je u okviru smotre horova i predstavio se u prelijepom svjetlu.

Iskrene čestitke svim našim takmičarima, njihovim roditeljima, vjeroučiteljima i džematu BICC Chicago.



MEVLUD



U povodu obilježavanja mjeseca rođenja posljednjeg Božijeg poslanika, Muhammeda, alejhis-selam, u subotu, 2-og decembra 2017.godine u džematu BICC upriličen je svečani mevludski program

Organizator ove prelijepog događaja bilo je Vijeće roditelja u saradnji i uz podršku džematskog Odbora, a program su izvela djeca iz Mekteba, omladinski hor Nur i čikaški imami.



Program je počeo obraćanjem imama domaćina, hfz. Muriza ef. Mešića, koji je kazao da nas mjesec rebiul-evvel svake godine iznova obavezuje da sa većom ljubavlju i čežnjom donosimo salavate na Poslanika, alejhis-selam. A onda su polaznici Mekteba izrecitovali nekoliko stihova u čast Allahovog Poslanika, a.s., i pročitali tekst u kojem se opisuju njegove plemenite osobine. Večer je ukraasio džematski hor Nur sa nekoliko prelijepih ilahija o poslaniku Muhammedu, alejhis-selam.





Gosti ovog programa bili su čikaški imami dr. Hazim ef. Fazlić i dr. Senad ef. Agić, koji je prisutne počastio nadahnutim vazom, a program je posebno ukraio novi imam Albansko-američkog islamskog centra u Čikagu, Ejup ef. Jakupi, svojim prelijepim učenjem Kur'ana, a zatim mevluda na turskom jeziku.

Jednostavno rečeno, ambijent i atmosfera te mevludske večeri u Čikagu podsjećala je na prijašnja vremena kada su se mevludi učili u mahalskim džamijama uz veliki broj onih koje mevludsko šerbe i dalje napaja.

Neka je salavat i selam na časnog pejgambera, Muhammeda, sallallahu alejhi ve sellem.





Omladina na skijanju

Omladinska grupa BYC u subotu, 17-og februara 2018.godine, organizovala je klizanje na ledu za svoje zainteresovane članove i one koji se smiju oprobati u toj vrsti sporta. Druženje je bilo jako zabavno i kao što vidite raspoloženje naše omladine uvijek je na najvišem nivou.



Druženje sa omladinom iz BYC

U subotu, 7-og aprila 2018.godine, omladinska grupa našeg džemata "Bosnian Youth of Chicago" organizovala je prelijepo porodično druženje. Cilj ovog druženja bio je da se zahvale svima koji ih podržavaju, ali i da zatraže od sviju nas da ih nastavio podupirati i bodriti. Oni su tom prilikom predstavili svoje aktivnosti iz protekle godine, a ovu večer sa nekoliko prelijepih ilahija ukraasio je džematski hor "Nur". Za sve prisutne omladina je organizovala kviz znanja, a nije falilo ni hrane. Možemo kazati da su se baš potrudili. Omladinska grupa našeg džemata je jedna od najaktivnijih na području Sjeverne Amerike, i s pravom možemo kazati da smo ponosni na njih.





BYC U AKCIJI

Omladinska grupa BYC našeg džemata je jedna od svijetlih tačaka naše bošnjačke čikaške zajednice. Oni su u subotu, 3-eg februara, učestvovali u projektu doniranja paketića za djecu bez roditelja kroz organizaciju "Fill a Heart for Kids". Tom prilikom njihova gošća bila je predstavnica navedene fondacije, koja se obratila

našim džematlijama i podijelila sa nama šokantne informacije o djeci koja nemaju roditelje ili djeci s kojom se trguje, pa smo sa njihove web stranice za Vas pripremili nekoliko takvih infoirmacija:

Why We Care BackPacs for Homeless Kids?

On an average night in America...

- 1.3 million Homeless Youths are struggling to survive without the support of any family.
- Many of these youths were abandoned by their families, escaped from physical, emotional or sexual abuse or aged out of foster care.
- Hundreds of homeless kids in Illinois are turned away from shelters daily because there are not enough beds.
- They sleep in dumpsters, abandoned buildings, under viaducts... wrapped in newspaper or tarps to stay warm and hidden from dangerous people and to protect their bodies from being bitten by rats.
- Many street kids are exploited and forced into survival sex for food and shelter.
- 1,000's of homeless kids need We Care BackPacs©!



Posjeta Hazimu Hadžaliću

U društvu Refika Čabrića, predstavnika Odbora za posjete, ovog proljeća naš imam posjetio je poznatog čikaškog, odnosno prijedorskog pjesnika Hazima Hadžalića koji se oporavljao od bolesti koja ga je kako kaže "pritisla ove zime".

Naš Hazim je jedan drag insan koji bi svaki naš mevlud i džamijsko druženje popratio stihovima iz zbirke svojih pjesama. Zato smo imali obavezu da ga zijaretimo.



Liječenje našeg učenika iz Mekteba

Nakon vijesti da se naš učenik iz Mekteba, Amar Drndar, bori sa teškom bolešću, na inicijativu vjeroučitelja Vijeće roditelja pokrenulo je akciju prikupljanja novčane pomoći u okviru koje je prikupljeno preko \$20,000.00, hvala Allahu.

Amar Drndar još uvijek se bori sa tom bolešću i svako ko želi pomoći može donirati putem GoFoundMe.

Amare, držimo ti fige!



Posjeta školi



Na poziv Mrs. Nickie Hulas naš imam, hfz. Muriz ef. Mešić, i njegova supruga, prof. Amina Sendić Mešić, u krajem februara ove godine boravili su u posjeti Catherine Cook School u downtownu gdje su djeca šestog razreda održali predavanje o islamu. Hfz. Mešić iskorsitio je priliku da nekoliko riječi kaže o Bošnjacima, Srebrenici i našoj državi, a prema utiscima djeca su bila jako oduševljena njegovom posjetom. On je pred svim učenicima tom prilikom proučio je ezan što je izazvalo veliko interesovanje i mnoštvo pitanja. Ovakve posjete su najbolji način da predstavimo našu bošnjačku zajednicu i naš narod.





RAZGLEDNICA IZ ČIKAGA

Na samom početku ovog teksta željela bih da se srdačno zahvalim ženskom ogranku džemata Bosanskom islamskom kulturnom centru (Bosnian Islamic Cultural Center), grupi pod nazivom „Bošnjakinja“ na čelu sa predsjednicom, profesoricom Aminom Sendić-Mešić, koje su organizovale i sponzorirale moju posjetu džematu „Bosnian Islamic Cultural Center“ u Čikagu, učinivši je ispunjenom aktivnostima i produktivnim druženjem sa članicama „Bošnjakinja“. Moja posjeta džematu „Bosnian Islamic Cultural Center“ u Čikagu bila je u detalje isplanirana, što se odnosilo ne samo na zvanični program koje su članice udruženja „Bošnjakinja“ dobro osmislile, već i na nezvanični dio koji je se sastojao u obilasku znamenitosti grada Čikaga. Posjeta i promocija knjige koja govori o našim Bošnjacima, muhadžirima u Sjevernoj Americi, pod nazivom „Bosnian Immigrants: Opportunities and Challenges“, organizirana je uz saglasnost džematskog odbora na čelu s uvažanim predsjednikom Elmedinom Halilićem, te u dogovoru s cijenjenim hafizom, profesorom Murizom ef. Mesićem, dok je svu administrativnu i finansijsku organizaciju na sebe preuzela ženska grupa „Bošnjakinja“. Tokom posjete džematu „Bosnian Islamic Cultural Center“ održano je predavanje za žene u petak poslije jaciye-namaza, 2. marta 2018. godine, kojem je prisustvovao veliki broj Bošnjakinja ovog džemata, te promocija knjige koja je održana u subotu naveče, 3. marta 2018., poslije jaciye -namaza u prisustvu velikog broja džematlija. Oba programa prošla su u divnoj atmosferi, uz ugodno druženje i veliku zainteresiranost, što se moglo vidjeti i kroz raznovrsna pitanja džematlija, što je svakako uveličalo ovo druženje. Organiziranost i kohezija, te međusobno poštovanje su karakteristike koje nesumnjivo krase ovaj džemat. Krasi ga i vizija i želja za velikim islamskim centrom koji će biti simbol jedinstva i snage, te mjesto gdje će mlade generacije Bošnjaka čuvati svoj

Autor: **Aiša Purak**



vjerski i kulturni identitet.

Uz određene poteškoće prouzrokovane velikim snijegom, zbog čega su otkazani letovi s aerodroma u gradu Rochesteru, savezne države New York, ipak sam, uz malo zakašnjenje, uspjela stići na zakazano predavanje za žene u džematu „Bosnian Islamic Cultural Center“ u Čikagu. Na aerodromu me dočekala mlada magistrica Enesa Mehmedović, zajedno sa Lejlom Husomanović koja trenutno pohađa srednju školu u Čikagu. Fascinirao me prizor dviju mladih i prelijepih djevojaka, Bošnjakinja s hidžabom, na aerodromu u Čikagu. Enesa i Lejla, obje veselih i ozarenih lica s osvježavajućim osmjehom, srdačno su me dočekale, te kroz krcati Čikago odvezle u džemat „Bosnian Islamic Cultural Center“ gdje nas je željno iščekivao veliki broj Bošnjakinja ovog džemata. Odmah po mom dolasku u džamijske prostorije krenuli smo sa programom. Uvodni dio pripremila je profesorica Amina Sendić-Mešić, koja je upoznala prisutne o mom dosadašnjem radu i aktivnostima. Mada je tema predavanja bila „Uloga žena u džematu“ gdje se govorilo o aktivizmu i volonterskom radu žena u džematima, skup ipak nije bio ograničen samo na ovu, svakako važnu temu. Džematlije su postavljale raznovrsna pitanja te izrazile

zabrinutost za svoju djecu, diskutirajući o načinima njihovog očuvanja od izazova i iskušenja modernog doba.

Bošnjakinje za primjer

Moje oduševljenje posjetom džematu „Bosnian Islamic Cultural Center“ u Čikagu počelo je još od prve komunikacije s predsjednicom udruženja žena „Bošnjakinja“, profesoricom bosanskog jezika Aminom Sendić-Mešić. Još od ranog djetinstva, živeći i odrastajući u sistemu gdje je bila prava rijetkost vidjeti fakultetski obrazovanu Bošnjakinju, za volanom i s hidžabom na glavi, aktivnu u javnom životu, imala sam san i viziju o ženi muslimanki i atributima koje bi Bošnjakinja trebala imati kako bi se suočila s izazovima vremena. Bošnjakinju sam vidjela kao jaku, samopouzdanu, samouvjerenu, obrazovanu, dotjeranu i urednu, korisnu svojoj porodici te svome društvu. Vidjela sam je kao ženu koja zna i poznaje svoju vjeru, svoja prava i obaveze, i koja se smjelo kači za oštru kuku upitnika pred gorućim pitanjima svoga vremena, ne dopuštajući ni liberalnim ni ultrakonzervativnim tumačima vjere i vjerskih propisa da je odvuku na svoju stranu. Bošnjakinja treba ostati uspravna, ponosna i znana, slijedeći prvi Allahov imperativ upućen čovječanstvu: „IKRE“ (čitaj i izučavaj). Upravo je takva profesorica bosanskog jezika u Čikagu, te predsjednica udruženja „Bošnjakinja“, Amina Sendić-Mešić. U njoj sam prepoznala model uzorite muslimanke i Bošnjakinje. Mahramu je počela nositi sa 13 godina jer je znala da time stiže Allahovo zadovoljstvo, a to joj je, kako kaže, uvijek bio glavni i primarni cilj. Završava Gimnaziju u Zavidovićima te se upisuje na studij Bosanskog jezika i književnosti u Sarajevu. Doista mi je bila velika čast i zadovoljstvo upoznati se i saradivati s profesoricom Sendić-Mešić. Posebno mi je drago da naša bošnjačka



djeca u Čikagu imaju vrsnog učitelja bosanskog jezika i književnosti. Ovom prilikom bih savetovala svim roditeljima koji još nisu upisali svoju djecu u Bosansku školu, da to urade čim prije. Inače, Bosanska škola djeluje još od 2012. godine u sklopu „Bosnian Islamic Cultural Center“ i pokrenuta je na inicijativu profesorice Sendić-



Mešić. Preko stotinu bošnjačke djece redovno pohađa ovu školu, a pored profesorice Sendić-Mešić djecu još uči profesorica Enisa Omerović, također profesorica bosanskog jezika i književnosti. Ukoliko neko želi da podrži ovaj izuzetno vrijedan projekat, može to učiniti putem PayPal-a koristeći email adresu: info@bicc-chicago.com.

Jedan od najorganiziranijih džemata u Sjevernoj Americi

Grupa „Bošnjakinja“ također egzistira od 2012. godine, te broji preko pedeset članica. Vrijedne i energične članice ovog društva organizirale su veliki broj kako humanitarnih, tako i donatorskih i edukativnih aktivnosti, uključujući stipendiranje učenika u Bosni i Hercegovini, pomaganje oboljelima, organiziranje zajedničkih izleta i druženja. Jedna od aktivnosti svakako je i predavanje za žene i moja promocija knjige u džematu „Bosnian Islamic Cultural Center“ u Čikagu. Ženska grupa „Bošnjakinja“ izuzetno je organizirana i sama finansira svoje aktivnosti. Finansiraju se uglavnom prodajom cvijeća, mahrama, hrane, itd., a imaju i svoj bankovni račun što im omogućava brži i efektivniji rad oko organiziranja širokog spektra aktivnosti i progama.



Pored ženskog udruženja „Bošnjakinja“ u džematu je još aktivna Omladinska grupa „Bosnian Youth of Chicago“ koja je osnovana 2013. godine s ciljem da se omladina druži i upoznaje kroz džematske aktivnosti. U sklopu „Bosnian Youth of Chicago“ formiran je hor pod nazivom „Nur“ 2015. godine, koji je zabilježio nekoliko značajnih nastupa, kako u samom džematu, tako i šire. Također, od 2012. godine pokrenut je program pod nazivom „Škola Kur’ana“ kroz koju je do sada prošlo preko 100 odraslih osoba, naučivši čitati Kur’ansko pismo. Ovaj džemat ne zaboravlja ni svoje najstarije i bolesne, tako da je u tu svrhu džematski Odbor osnovao Odbor za posjete starijima i bolesnima.

Džemat „Bosnian Islamic Cultural Center“ u Čikagu broji preko 700 članova i zasigurno jedan od aktivnijih i možda najbolje organiziranih džemata na području Sjeverne Amerike, zahvaljujući prvenstveno imamu, hafizu Murizu ef. Mešiću, o kome njegove džematlije imaju samo riječi hvale. Kako kažu, on „svojim blagim i lijepim ophođenjem sa džematlijama plijeni srca i otvara vrata svima“. Naravno, džemat ne bi mogao biti tako dobro organiziran i uspješan bez Džematskog odbora na čelu sa Elmedinom Halilićem, koji je omogućio nesmetan rad svim grupama i udruženjima u sklopu džemata. Svi oni nesmetano rade i djeluju pod džamijskim kro-

vom, uz izuzetnu podršku hafiza Mešića i Džematskog odbora. Po svojim aktivnostima, organiziranosti, harmoniji, raznovrsnosti programa i projekata koji se organiziraju u ovom džematu, „Bosnian Islamic Cultural Center“ u Čikagu može poslužiti kao uzor i primjer mnogim bošnjačkim džematima, ne samo u Americi, nego i širom svijeta. U februaru 2018. godine osnovano je i „Savjetodavno vijeće“ za čijeg predsjednika jednoglasno je izabran advokat Amir Ovčina, dok su za koordinateure izabrani Semir Delić i Edis Bečić. „Savjetodavno vijeće“ će rukovoditi projektom izgradnje novog islamskog centra pod nazivom Islamski centar „Čamil ef. Avdić“, nazvanog po imenu velikog bošnjačkog imama i vizionara, te jednog od prvih bošnjačkih imama na ovim prostorima. Na kraju bih se još jednom zahvalila prvenstveno predsjednici ženskog udruženja „Bošnjakinja“, profesorici Sendić-Mešić, na perfektnoj organizaciji mog putovanja, smještaja, programa za žene i promociji knjige, te obilaska grada Čikaga. Zatim, zahvalila bih se svim ostalim članicama udruženja „Bošnjakinja“ koje su sponzorirale moju posjetu BICC-a džematu, te me obradovale divnim poklonom, izgraviranim hemijskom olovkom kojom ću potpisivati svoje knjige. Srdačno bih se zahvalila Rabi Mehmedović, Sabini Husomanović i profesorici Sendić-Mešić na predivnom druženju i obilasku grada Čikaga, te divnoj večeri u restoranu „Sarajevo“ u Čikagu. Duboko se zahvaljujem i vrijednoj Almi Mujanović na prekrasnom poklonu kolekcije sapuna koje sama pravi. Sapuni su umirujućeg mirisa te su divna ideja za poklon. Sapune možete naručiti putem Alminog facebook profila. Iskreno se zahvaljujem svim džematlijama BICC-a koje su došle da slušaju moje predavanja za žene i učinile sve kako bih se što ugodnije osjećala u njihovom džematu. Iskreno se zahvaljujem i svim džematlijama BICC-a koji su došli na



promociju moje knjige te molim Uzvišenog Allaha, dž.š., da im olakša gradnju novog islamskog centra „Čamil ef. Avdić“. Za sve vakife, ovo je izvredna prilika da se ugrade u ovaj projekat, a Vaše donacije možete uplaćivati preko web stranice www.bicc-chicago.com

Druženje sa našim doktoricama

U prepunoj kafeteriji našeg džemata u organizaciji ženske grupe Bošnjakinja proteklog vikenda (April 28, 2018) predavanje o zdravlju održale su naše čikaške doktorice, dr Azra Sadiković i dr Alma Arslanagić.

One su se predstavile u najboljem svjetlu, a teme o kojima su kazivale bile su aktuelne i zanimljive.

Da su ovakva druženja jako zanimljiva i potrebna našoj zajednici najbolje pokazuje interesovanje ženskog dijela džemata.

Ženska grupa se zahvaljuje svim sestrama na ogromnoj podršci i raduje se što sve veći broj žena podžava rad ženske grupe i edukativne projekte na kojima se kontinuirano radi.

Na kraju druženja, ispred Odbora grupe, prof. Amina Sendić-Mešić, gošćama je uručila prigodne poklone.





Kako izgraditi zdravu

PORODICU

Posljednjeg vikenda u mjesecu aprilu ove godine, na poziv fondacije Peaceful Muslim Family, naš imam hfz. Muriz Mešić, prisustvovao je predramazanskom treningu za imame koji je organizovan u novootvorenom turskom centru u Baltimoru - Diyanet Center of America.

Cilj ovog treninga bio je da se imami i kaplani, kao osobe koje se redovno susreću sa različitim vrstama porodičnih problema, obuče kako da adekvatno odgovore na sve vrste izazova kroz koje prolaze članovi naših zajednica. Osim toga, trening je sačinjavao edukativnu nadogradnju u pogledu prava koje sa zakonske i vjerske strane uživaju supružnici, kao i djeca. Vrlo korisno je bilo slušati imama najvećeg islamskog centra na istočnoj obali, dr. Madžida, i profesionalnog licenciranog trenera dr. Salmu Elkadi Abugideiri, i druge predavače o važnosti preventivnog djelovanja i vjerskih konsultacija u pogledu izgradnje zdravog porodičnog ambijenta i sprečavanju nasilja u porodicama koje je itekako prisutno i u bošnjačkim familijama.

Trening je bio jako intenzivan i sa obrazovnog aspekta jako sadržajan, a njemu su prisustvovali imami, njih 16, iz različitih muslimanskih zajednica sa područja cijele Amerike.

Na osnovu uspješno okončanog treninga prisutnima su uručena svjedočanstva i priznanja. Svi imami



i kaplani na kraju treninga potpisali su deklaraciju o osudi nasilja u porodici, a kao jedini predstavnik bošnjačke zajednice tu deklaraciju potpisao je i naš imam.

Ovakvi programi koriste našim imamima da adekvatnije odgovore izazovima s kojim se susreću u džematima, a osim toga služi i kao dobra obrazovna nadogradnja i razmjena iskustava sa drugim muslimanskim zajednicama.



Iftar Youth



Iftar kod Mayora



Delagacija džemata BICC koju su činili predstavnici džematskog Odbora (Nedžad Ković, Dževad Šorlija, Nermin Krličević), Savjetodavnog vijeća (Amir Ovčina, Edis Bečić), Nadzornog Odbora (Nihad Latić) i Bosanske škole (Amina Sendić-Mešić, Enisa Omerović) na čelu sa imamom (Muriz Mešić) večeras su u Chicago Cultural Center prisustvovali iftaru kojeg je upriličio Mayor Chicaga, Rahm Emanuel. Oni su iskoristili tu priliku da Mayora upoznaju o bosanskoj zajednici u Čikagu, projektu Bosanske škole i pozvali ga da bude naš gost na jednoj od narednih svečanosti. Također, susreli su se i porazgovarali sa našom aldermenkom, Mrs. Debrom Silverstain, koja je izrazila želju da se sastane sa predstavnicima Savjetodavnog vijeća. Posebno se zahvaljujemo gosp. Selman Aftab-u koji se potrudio da predstavnike našeg džemata predstavi Mayoru i prisutnim zvanicima.



Naš ramazanski gost, hfz. DAVUD EFENDIĆ



Hafiz Davud Efendić rođen je 1995. godine u Zavidovićima. Nakon što je završio Prvu osnovnu školu u rodnom gradu kao učenik generacije, upisuje se u Behram-begovu medresu u Tuzli. Hifz je počeo učiti pred ocem, hafizom Mustafom Efendićem, a kompletirao ga je pred hafizom Mirnesom Spahićem, profesorom Kiraeta u Behram-begovoj medresi. Pred komisijom Rijaseta IZ, cijeli Kur'an je proučio od 2. do 16. januara 2012. g. i tako stekao zvanje hafiza Časnoga Kur'ana. Učestvovao je na brojnim takmičenjima učača Kur'ana, koja ćemo ukratko i navesti:

- Osvojeno I mjesto u kategoriji hifza 20 džuzeva na VII takmičenju u hifzu Kur'ana u Sarajevu,
- Osvojeno I mjesto u kategoriji hifza 15 džuzeva na 19. evropskom takmičenju učača Kur'ana u Zagrebu,
- Osvojeno V mjesto u kategoriji hifza 20 džuzeva na 34. internacionalnom takmičenju učača Kur'ana "Kralj Abdul-Aziz" u Mekki,
- Učešće na I internacionalnom takmičenju učača Kur'ana u Istanbulu,
- Učešće na svjetskom takmičenju učača Kur'ana u Dubaiju,
- Osvojeno I mjesto u kategoriji cijeli Kur'an s tefsirrom sure Al-Baqara na XI takmičenju u hifzu Kur'ana u Sarajevu.



Pored takmičenja iz učenja Kur'ana, hafiz Davud Efendić učestvovao je na općinskim, kantonalnim i federalnim takmičenjima iz historije, engleskog jezika i fizike. Na XII takmičenju iz arapskog jezika između medresa na nivou Rijaseta IZ, koje je održano 24. marta 2014. g., kao član tima koji je predstavljao Behram-begovu medresu, osvojio je 1. mjesto u pojedinačnom plasmanu. Učestvovao je na literarnim konkursima koje je raspisivala Behram-begova medresa, gdje je osvajao prva mjesta.

Behram-begovu medresu je završio kao učenik generacije u školskoj 2013/14. g., nakon čega se upisuje na Fakultet islamskih nauka u Sarajevu gdje je trenutno redovan student IV godine na smjeru Islamska teologija. Tokom studija učestvovao je na brojnim radionicama, konferencijama i seminarima iz domena međureligijskog dijaloga i savremene muslimanske misli.



RAMAZAN U ČIKAGU

Bošnjaci u Čikagu kroz djelo Ćamil ef. Avdića žele sačuvati svoje jedinstvo i nastaviti utabanim stazama čestitih prethodnika



U Čikagu Bošnjaci baštine stoljetnu tradiciju institucionalnog djelovanja. Prva institucija koju su Bošnjaci osnovali u Čikagu bila je "Džamijetu-l-hajrije" još davne 1906. g. Zbog ove činjenice, Čikago za Bošnjake Sjeverne Amerike, predstavlja svojevrsni centar iz kojeg su nastali veliki broj džemata, kulturnih, humanitarnih, obrazovnih i drugih organizacija.

Prvi vjerski lider i imam u Sjevernoj Americi bio je rahmetli Ćamil ef. Avdić. On je u Čikago stigao 1954. g. Ćamil ef. Avdić je osoba koja je postavila temelje organiziranog vjerskog života Bošnjaka u Čikagu. Također, njegova intelektualna zaostavština je od neprocjenjive vrijednosti. Simbol truda i djelovanja Ćamil ef. Avdića i njegove generacije je čuveni Islam-

ski centar Greater u sjevernom dijelu Čikaga. To je onaj Islamski centar, sa crvenom fasadnom ciglom, čiju smo sliku zapamtili iz Ilmihala. To je bio dugo vremena jedini džemat Bošnjaka u Čikagu.

Nakon agresije, u Čikago, preselio se novi val izbjeglica iz BiH. Čikago je svjetska metropola i život u takvom gradu je izuzetno brz. Prema nezvaničnim podacima broj Bošnjaka u Čikagu iznosi preko 40.000. Spletom različitih okolnosti, pojavila se potreba za osnivanjem drugih džemata u Čikagu. Danas u Čikagu djeluju četiri bosanska džemata. Ovog ramazana imao sam čast biti ramazanski gost džemata BICC Chicago (Bosanski islamski kulturni centar), ali i posjetiti još dva bosanska džemata: ICGreater Chicago i džemat SABAH.

Džemat BICC Chicago

Džemat "Bosnian Islamic Cultural Center (BICC)", poznatiji kao "džemat na Westernu", osnovan je na inicijativu Bošnjaka koji su se nastanili bliže središtu grada Čikago.

Od 2012. g. imam ovog džemata je hfz. Muriz ef. Mešić. Svojim angažmanom, kapacitetom i entuzijazmom pokrenuo je veliki broj aktivnosti. Uvodi učenje hafiske mukabele tokom mjeseca ramazana, te nastavlja sa akcijom proširenja džematskog mezarja koje danas broji 1000 ukopnih mjesta. Hfz. Mešić je

posebnu pažnju stavio na djecu i omladinu, kao i na građenju međusobnog povjerenja i saradnje u među džematlijama. Za kratak period ovaj džemat je izrastao u jedan od najvećih džemata u okviru Islamske zajednice Bošnjaka Sjeverne Amerike i danas broji preko 700 članova, dok mekteb već nekoliko godina zaredom pohađa 240 učenika različite dobi.

U 2012. g. pokrenut je još jedan važan projekat ovog džemata, a to je škola bosanskog jezika pod imenom – *Bosanska škola*. Ovu školu pohađa više od 100 učenika. Profesorice bosanskog jezika Amina Sendić-Mešić i Enisa Omerović ulažu ogromno truda da kod djece razvijaju i sačuvaju nacionalni i kulturni identitet. "Bosanska škola" je certifikovana od strane Ministarstva civilnih poslova BiH i kao takva je jedinstvena na teritoriji Sjeverne Amerike. Podršku ovom projektu pružio je i Generalni konzulat BiH u Čikagu.

U okviru džematskih aktivnosti još djeluju ženska grupa "*Bošnjakinja*", omladinska grupa "*Bosnian Youth of Chicago*", hor ilahija i kasida "*Nur*", Savjetodavno vijeće, Vijeće roditelja itd.



Prva bosanska hafiska mukabela

Odgovorni ljudi iz džemata BICC Chicago ovaj ramazan odlučili su podići ljestvicu i postaviti visoke standarde u ramazanskim sadržajima i aktivnostima. Ovog ramazana angažirali su studenta Fakulteta islamskih nauka u Sarajevu hafiza Davuda Efendića za teravih imama. Zadnjih deset dana ramazana bio sam počašćen održati nekoliko predavanja i pripremiti različite programe koji su obogatili ambijent ramazana. Osim toga u džematu, ovog ramazana,

učena je, po prvi puta u historiji IZ u Sjevernoj Americi, tradicionalna bosanska hafiska mukabela sa tri hafiza. Mukabelu su učili hafizi: Muriz Mešić, Davud Efendić i Špendi Fidani. Valja istaći posjetu i praćenje mukabele od strane velikog broja džematlija.

Islamski centar Ćamil ef. Avdić

Potrebu za novim Islamskim centrom pokazao je i ovaj ramazan. Obavljajući teravijah-namaza po hodnicima, društvenim prostorijama, nedostatak adekvatnih učionica itd. Tako da je džemat BICC u noći Lejletu-l-kadra, 1. jula 2016. g., pokrenuo akciju izgradnje novog islamskog centra u Čikagu pod imenom "Islamski centar Ćamil ef. Avdić". Cilj pokretanja ovog projekta je da se budućim generacijama obezbijede bolji uslovi za organiziranje vjerskih, obrazovnih i kulturnih aktivnosti.

Islamski centar Ćamil ef. Avdić je generacijski projekat Bošnjaka u Čikagu. I to, uglavnom, one generacije koja je nakon agresije na BiH preselila u Čikagu. Imenovanjem centra po Ćamil ef. Avdiću šalje se jedna velika simbolička poruka koju bi proformulisao na slijedeći način: Bošnjaci u Čikagu kroz djelo Ćamil ef. Avdića žele sačuvati svoje jedinstvo i nastaviti utabanim stazama čestitih prethodnika.

Ponovno i ove godine, u noći Lejletu-l-kadra, džematlije su potvrdile posvećenost izgradnji Islamskog centra. Na prigodnom programu povodom najodabranije noći, za potrebe izgradnje IC Ćamil ef. Avdić, ukupne dvogodišnje donacije prešle su milion američkih dolara. Savjetodavno vijeće za izgradnju ovog centra je u pregovorima sa odgovornim ljudima za adekvatnu lokaciju budućeg centra.



Veza dobročinstva Čikaga i Ljubljane

Između Čikaga i Ljubljane postoji jedna prelijepa veza dobročinstva koju smo oživjeli ovoga ramazana. Ljubljana je, također, 70-tih godina imala velikog aktivistu, čiji trud za organizaciju vjerskog života, uistinu, inspiriše. To je bio rahmetli Adil

Begović. On je 1972. g. u Glasniku IZBiH objavio jednu vrstu apela za pomoć u kupovini prvog mesdžida u Ljubljani po naslovom "Pomoć za mesdžid u Ljubljani". U tom obraćanju, rahmetli Adil Begović, navodi podatak da su za potrebe kupovine mesdžida u Ljubljani, među prvima dostavili donaciju Bosansko – Američka organizacija sa sjedištem u Čikagu na čelu sa predsjednikom Ćamil ef. Avdićem.

Nakon 46 godina, djeci onih koji su tada pomogli – neke od njih sam i lično upoznao, IZ u Sloveniji i džematlije džemata Ljubljana uzvratili su simboličnom donacijom i podrškom u izgradnji njihovog centra. Ovaj gest uzvraćanja na dobročinstvo koje niko više ne pamti u Čikagu, naišao je na izuzetno lijep prijem.

Daleko od rodne grude, u Čikagu, ovaj mubarek ramazan ispunjen je bio brojnim aktivnostima, druženjima i ibadetima. Jedna pozitivna i lijepa atmosfera se mogla osjetiti prilikom svakoga susreta sa brojnim aktivistima. Organizacija džemata BICC je jedna dostojanstvena slika islama, Bošnjaka, ali i BiH u Čikagu. Vjerujemo da će Čikago uskoro dobiti još jedan Islamski centar koji će svijetliti staze budućim generacijama.

HAFISKA MUKABELA u Čikagu

Ostat će upamćeno da je tokom Ramazana 1439.h.g./2018.god po Miladu po prvi puta u historiji Bošnjaka Sjeverne Amerike u Čikagu učena hafiska mukabela sa tri hafiza koji su pred Komisijom Rijasetu IZ u BiH položila hifz, a oni su:

Hfz. Muriz Mešić (BICC), Hfz. Špendi Fidani (IC Ljubljana, Slovenija) i hfz. Davud Efendić (FIN, Sarajevo).

Posjetite nas na:
www.bicc-chicago.com



Mr. Sead ef. Mrahorović u BICC-u

Povodom Dana Bedra gost predavač u našem džematu ovog ramazana je bio mr. Sead ef. Mrahorović, glavni imam MIZ Banovići.

On nas je počastio lijepim predavanjem o značaju Bedra, dok je Hfz. Davud Efendić proučio dovu šehidima Bedra i predvodio Teravijah namaz.

Ovaj ramazan u našem džematu bio je ispunjen mnogobrojnim gostima i hairli aktivnošću, hvala Allahu.



Veličanstvena noć

Kadr u Čikagu

Mubarek noć Lejletu-l-Kadr inspirisala je Bošnjake Čikaga da se odazovu pozivu njihovog imama hafiza Muriza ef. Mešića u akciji prikupljanja sredstava za izgradnju Islamskog centra Ćamil ef. Avdić u Čikagu.



Nakon prigodnog programa povodom mubarek noći Kadr, koji su izveli hafiz Davud Efendić i članice hora Nur, poneseni nadahnutim obraćanjem ljubljanskog imama hafiza Špendija ef. Fidanija i porukom koju je sa sobom donio, pristupilo se prikupljanju donacija.



Donatorsko večer na njemu svojstven i originalan način vodio je hafiz Muriz Mešić. Cilj da se prikupi iznos od milion dolara, koji je postavljen na početku večeri, uspješno je ostvaren, hvala Allahu. Članovi džematačkog odbora, savjetodavnog vijeća i ženske grupe Bošnjakinja to večer bili na visini zadatka.

Ova veličanstvena večer, ispunjena emocijama i željom da se učestvuje u izgradnji trajnog dobra, ostat će u trajnom sjećanju Bošnjacima Čikaga.

Špendi F.





RAMAZANSKI BAJRAM 2018





Svečano otvaranje džamije u Hamiltonu (Canada)



Drugog vikenda nakon ramazana džemat BIC Hamilton svečano je otvorio novosagrađenu džamiju u prisustvu više stotina vjernika.

Toj svečanosti prisustvovao je veliki broj zvanica na čelu sa reis-ul-ulemom, dr. Huseinom ef. Kvazovićem.

Naš džemat predstavljao je imam hfz. Muriz ef. Mešić koji je iskoristio tu priliku da u ime džemata BICC Chicago uruči donaciju džematu BiC Hamilton i da reis-ul-ulemi predstavi izgradnju našeg novog centra. Reis-ul-ulema, dr. Kavazović pozdravio je izgradnju Islamskog centra Čamil ef. Avdić u Čikagu i poselamio Bošnjake Čikaga.



VEČER VAKIFA 2018

U prelijepom ambijentu hotela Holiday Inn u Skokiju, trećeg dana ramazanskog bajrama 1439.h.g, odnosno 17-og juna 2018.godine po Miladu, održana je druga po redu bajramska svečanost "Večer vakifa 2018".

Nakon prelijepog ramazana uz mnoštvo različitih vjerskih, kulturnih i donatorskih aktivnosti, bošnjačka čikaška zajednica zaslužila je jedan ovakav događaj. Program su na profesionalan način vodili **mr. Semir Delić** i **prof. Enisa Omerović**, a ponuđeni sadržaj bio je i više nego bogat.



Nakon poslužene večere, na početku programa prisutnima se obratio sekretar džemata, **Nedžad Ković**, koji je predstavio aktivnosti džematskog Odbora. Profesorica **Amina Sendić-Mešić** predstavila je projekat Bosanske škole,



kao i naš imam, hafiz Muriz Mešić. Ovom događaju prisustvovali su i gosti iz političkog života na čelu sa novim Illinois State Senatorom **Mr. Ram Villavilamom**, a pored njega prisutan je bio i naš konzul, **gosp. Edin Šehić**, koji se prisutnima obratio i pozdravio akciju izgradnje novog centra.



Projekat izgradnje novog islamskog centra IC Čamil ef. Avdić predstavili su **Amir Ovčina**, predsjednik Savjetodavnog vijeća, i **Edis Bečić**, koordinator projekta, koji su prezentovali sljedeće korake na kojima radi navedeno vijeće. Oni su naglasili značaj prikupljanja sredstava na ime izgradnje novog centra i pozvali prisutne da podrže ovaj projekat. Tokom sinoćnje noći prikupljeno

a učenica te škole – **Nejra Šehović**, izrecitovala je pjesmu Nedžada Ibrišimovića – "Bosna". Ovogodišnju noć svojim prisustvom ukrasili su i čikaški imami; **dr. Senad ef. Agić**, **dr. Hazim ef. Fazlić**, **Edhem ef. Šahinović** i **Emil ef. Škrijel**, dok su specijalni gosti večerašnjeg programa bili muftija ICNAB-a, **dr. Sabahudin ef. Čeman** i gl. imam medžlisa Midwest, **Osman ef. Brkić**, koji su se također obratili prisutnima, čestitali bajram i pohvalili rad džemata BICC. Pored navedenih gostiju prisutni su bili ramazanski teravih imami, **hafiz Špendi Fidani** i **hafiz Davud Efendić**,



je preko **\$20,000.00**, a najveći donator bio je džemat IC Rumija sa \$10,000.00 kojeg je te večeri predstavljao njihov predsjednik **Husnija Spahić**. Do sada je na ime izgradnje novog centra prikupljeno preko \$1,040,000.00, hvala Allahu.

Zabavni dio programa bio je posebno zanimljiv i raznovrstan. Njega je otvorio naš čikaški sazlija **Mirsad Zulić** sa dvije muzičke numere, a zatim su nastupile folklorne grupe, od kojih je prva bila **KUD Bosna** koju na profesionalan način već preko 20 godina vodi **Mirzet Džubur**, i folklorna grupa **KUD BH Club** koju vodi **Amela Cerić**. Posebne simpatije pobrale su članice **hora NUR** na čelu sa novim solistom prelijepog glasa, **Ernesom Kišićem**, koji je prisutne oduševio svojim izvedbama.

Na kraju programa, prisutnima se obratio imam BICC-a, **hafiz Muriz Mešić**, koji se zahvalio cijeloj čikaškoj zajednici na ogromnoj podršci, te pohvalio rad džematskog odbora, Savjetodavnog vijeća, ženske grupe Bošnjakinja, omladinske grupe Bosnian Youth of Chicago, te rad Vijeća roditelja. Zahvalio se mnogobrojnim pojedincima, džematima i udruženjima na podršci i njihovom učešću u ovoj prelijepoj večeri.

Posebno se zahvaljujemo **Murisu Hubjeru, Kamberu Hadžiću, Senadinu Gredelju, Vasviji Čolpi, Jasmini Ejupović, Sabini Husomanović, fotografu Ibrahimu Hadžiću, Bušri Qajjum, predstavnicima džemata ICC Greater Chicago, SABA, WBICC, Sabur, IC Rumija** i svima onima koju su doprinijeli na bilo koji način da ova noć izgleda tako lijepo.



Bila je ovo još jedna prelijepa noć, a ne smijemo zaboraviti da su djeca te večeri posebno uživala jer su im članovi džematskog Odbora uz ispomoć Amele Cerić i omladinske grupe BYC priredili pravu **dječiju zabavu** uz mnoštvo poklona. Bio je to istinski bajramski program.

Zato, još jedanput, bajram mubarek olsun!



COMPANY DRIVER
OWNER OPERATOR



**FIND OUT WHAT IT REALLY
MEANS TO DRIVE IN BDJ TRUCKING**



WELCOME TO BDJ TRUCKING



SAFETY IS OUR PRIORITY
JOIN OUR TEAM TODAY, START YOUR CAREER



**BDJ TRUCKING HAS EXPERIENCED DRIVERS WITH DRIVER
HISTORY IN WEST EUROPE, UNITED STATES AND CANADA**



HEADQUARTERS
1425 Payne Road,
Schaumburg IL 60173
[Driving Directions](#)



CORPORATE PHONE
(224) 592-5010
**24-HR DISPATCH
SERVICE**
(224) 592-5010 ext 4



CORPORATE EMAIL
loads@bdjtrucking.com
CORPORATE FAX
(224) 592-5014



BUSINESS HOURS
Mon - Fri: 8am - 6pm
Saturday: 10am to
2pm
Sunday: Closed